

卷一 陰虛勞熱

卷二 喘息 陽虛 心病 肺病 嘔吐 隔食

吐血 消渴 癰閉

東中藥西錄前三期合編

卷三 黃痺 淋濁 痢 燥結 泄瀉 痰飲

顛狂

卷四 大氣下陷 氣血鬱滯 肢體疼痛



張序

吾友壽甫張君宿學士也自幼讀書卽不落恆蹊長而好學篤志近思一字一句不容放過於六經類多深造而尤邃於易曾衍有圖說以發前人未發之奧夫易由四聖以成而吾友探賾索隱別具神奇非大聰明曷克語此嘗見以文會友談妙理揭精蘊舉座傾聽共相首肯知其得力者深也方今大重算學天元代數諸書耐人尋味實費人研究而吾友一見卽解因著書立說教課生徒多所成就凡此固天資高亦由學力到也名爲實之賓吾友能勵躬行尙節義立廉隅修於己聞於人雖身爲布衣而於流俗之波靡殊有整頓誠者物之終始不誠無物吾友天性諒直無稍涉虛浮忠信爲本實事求是此其所以進德卽其所以立業也今夫人有文固貴有本能知尤貴能行博雅弘通之士當持論剴切非不娓娓動人及徵諸日用之地宣於口者不能體諸身以視吾友之本末交修知行並進豈可同日語哉其誦讀餘暇兼及醫學於中西方書搜閱極博而生平得力實在乎本經內經恆因經文一二語悟出無限法門故其臨證手到病除卽病勢重危羣醫束手一經診視立能回春然此特吾友之緒餘初非以此見長也迨夫閱歷日久其經驗良方

不忍拋棄爰成斯編質諸同好志在濟人情殷覺世指迷津普慈航一片婆心喚醒夢夢是不獨收效於當時尤將流澤於後世也雖然天性發爲文章事功根於學問吾願覽斯編者不以醫視醫而以經術視醫審其製方之精義用藥之要着化裁通變方智圓神於以見醫學精華之流露卽以見六經精華之流露也而吾友之深於經學彰彰矣乃知道明德立之儒不爲良相必爲良醫利用厚生之道與起死回生之能其事異其理同也宣統二年季春愚弟張愼敬亭氏敬序

袁序

夫古者神農本經實爲藥性之真詮軒轅內經窮盡陰陽之奧旨於以歎聖神首出不但利濟一時實能利濟萬世也至漢張仲景得伊聖湯液經更上溯本經內經之精義著傷寒金匱兩書醫學於以大備後世論醫學者推爲正宗但本經內經醫者多因其文字艱深義蘊難窺束閣不觀傷寒論及金匱醫者又多畏疑其方而不敢輕試雖晉唐迄今諸名家立論咸遵古訓而闡發本經內經及傷寒金匱諸書仍多餘蘊至獨出已見更能發前人所未發則行世方書中誠不易覩也吾友張壽甫君鹽山博雅士素有窮經工夫於

本經內經及仲景以後諸名醫著作莫不探索其精奧又鐸王松人醫學及西人化學之理亦恆運用於方藥之中是以生平臨證疏方活人無算於內傷外感諸要證無不應手輒效而其屢試屢驗之方久而恐其遺失輒於方後各加詮解並附載緊要醫案緝爲八卷名曰醫學衷中參西錄實能闡發前人所未發更能融匯中西爲一致見者爭相傳鈔予於春杪客京師適見鈔本讀閱一過驚爲當時醫學中有一無二之著作函勸於內務部呈請立案公諸世界君韙予言內務部果批准有著作權而君仍未敢自信也於夏季正自錄真本並細加研思夜以繼日心力疲甚不覺睡去夢升講臺對大衆演說醫理忽有人捧一冠若南海大士所戴蓮花冠形爲加於首醒後恍悟曰此中殆有神靈欲我速成此書以普濟羣生也遂覺精神奮發頓忘其勞而付梓之意亦決並委予以參訂予雖不習醫然十年作吏於民間疾苦時痼瘵在抱頗志同而道合焉古人云上醫醫國又云爲醫等於爲相君之大著欽佩已深故樂得而贊成之

民國六年季秋奉天桓仁愚弟袁澍滋霖普序

蘇序

先王以不忍人之心行不忍人之政醫書之作其具不忍人之心乎生命至重也辨證不清投劑多誤時有因此而戕賊人者斯道也非寢饋於古今中外各家諸書悉心抉擇獨闢機緘不足以問世非洞明陰陽氣運虛實表裏之理盡人合天如見肺肝不足以臨證以故神農黃帝而後以醫學著者若扁鵲若倉公若張仲景若王叔和僅間世一出豈彼蒼有所祕惜歟誠以醫理精微空談易實施良難也若本其生平之著作施用於臨證之際而皆能得心應手者誠曠世不一覩也僕於往歲有志醫學涉獵羣書未竟其事因西學發明太陽不動地球繞轉之說風行一世詳究其理疑義叢生因疑生悟由是研究天地學歷十餘寒暑未暇兼顧醫學而傾慕之心仍未有已也民國五年秋以自製天地模型入都呈准 大部適有鹽山張壽甫先生函寄醫書原稿八卷簽題醫學衷中參西錄且云拙作本懷救世之心深恐已誤誤人請校正焉翻閱數過觀其審證精詳立方確當究藥性之寬猛以老幼強弱爲標準不拘拘成法不趨於險路誠所謂獨闢機緘如見肺肝者也以之問世臨證必不脛而走但僕於醫學麤知津涯何足負校正之責必質諸高明始不負壽甫先生濟世之苦心遂於民國六年春與同張君鍾山姜君指歐代

爲呈部註冊立案。回奉後卽乞醫學研究會正副會長高振鐸王松閣兩先生暨精於醫術諸同人詳加校正。不惟人人稱絕。凡遵其方施治者莫不立起。沈疴是真能振興醫學大有進化者矣。於是遂與同社友集資代付剞劂。以公諸同好。俾百萬蒼生羣躋壽域。則於不忍人之心庶乎近焉。書成後爰書數行於編首以誌巔末。

中華民國七年三月九日蘇中宣明陽氏序於瀋陽天地新學社

自序

人生有大願力而後有大建樹。一介寒儒伏處草茅。無所謂建樹也。而其願力固不可沒也。老安友信。少懷孔子之願力也。當令一切衆生皆成佛如來之願力也。醫雖小道。實濟世活人之一端。故學醫者爲身家溫飽計。則願力小。爲濟世活人計。則願力大。而此願力之在。錫純又非僅一身之願力。實乃祖訓斯紹也。錫純原籍山東諸城。自前明遷居直隸鹽山邊務里。累世業儒。先祖友三公繼修家乘。垂訓來茲。謂凡後世子孫讀書之外。可以學醫。蓋卽范文正公不爲良相必爲良醫之意也。錫純幼時從先嚴丹亭公讀書。嘗述斯言以教。錫純及稍長。又授以方書。且爲指示大意。謂誦讀之暇。遊藝於此。爲益良多。且又

遵祖訓也。特當時方習舉子業，未能大致力於斯耳。後兩試秋闈，不第。雖在壯年而淡於進取，遂廣求方書，遠自農軒，近至國朝著述諸家，約共搜閱百餘種，知本經與內經，詒之開天闢地之聖神，爲醫學之鼻祖，實卽爲醫學之淵海也。迨漢季張仲景出，著傷寒金匱兩書，爲本經內經之功臣。而晉之王叔和、唐之孫思邈、王壽、宋之成無己、明季之喻嘉言，又爲仲景之功臣。國朝醫學昌明，人才輩出，若張志聰、徐大椿、黃元御、陳念祖諸賢，莫不率由仲景，上溯本經內經之淵源，故其所著醫書皆爲醫學正規。特是自晉唐迄今，諸家著述，非不美備，然皆斤斤以傳舊爲務，初未嘗日新月異，俾吾中華醫學漸有進步。夫事貴師古者，非以古人之規矩準繩限我也。惟藉以淪我性靈，益我神智，迨至性靈神智洋溢活潑，又貴舉古人之規矩準繩而擴充之，變化之，引伸觸長之，使古人可作，應歎爲後生可畏。凡天下事皆宜然，而醫學何獨不然哉？錫純存此意念，以孜孜研究醫學者有年，偶爲人疏，方輒能得心應手，挽回沈疴。時先慈劉太君在堂，錫純恐溫清有缺，不敢輕應人延請，適有以急證相求者，錫純造次未遑，應先慈謂，錫純曰：病家盼醫如溺水求援，汝果能治，宜急往救之。然臨證時須多加小心，慎勿鹵莽誤大。錫純唯唯受教，自此臨證者

幾無虛日至今十餘年矣今匯集十餘年經驗之方其屢試屢效者適得大衍之倍數方後綴以詮解與緊要醫案又兼採西人之說與方中義理相發明緝爲八卷名之曰醫學衷中參西錄有客適至翻閱一過而問曰觀子之書多能發前人所未發於醫學誠有進化然今凡百事皆尙西法編中雖採取西人之說而不甚採取西人之藥恐於此道仍非登峯造極也答曰中華苞符之秘啓自三墳伏羲易經神農本經黃帝內經是也伏羲畫易在有文字之前故六十四卦止有其象而能包括萬事萬物之理經文王周公孔子闡發之而猶有餘蘊本經內經之包括醫理至精至奧神妙無窮亦猶易經之包括萬事萬物之理也自周末秦越人後歷代諸賢雖皆有發明而較之三聖人之闡發易經實有不及故其中餘蘊猶多吾儒生古人之後當竟古人未竟之業而不能與古爲新俾吾中華醫學大放光明於全球之上是吾儒之罪也

錫純日存斯心孜孜忘老於西法醫學雖嘗涉獵實未暇將其藥餌一一試驗且其藥多係猛烈之品又不敢輕於試驗何能多採取乎然斯編於西法非僅採用其醫理恆有採其化學之理運用於方藥中者斯乃合中西而蠲貫爲一又非若採用其藥者僅爲記問之學也特是學問之道貴與年俱進斯編

既成之後行將博覽西法更採其可信之說與可用之方試之確有效者作爲續編此有志未逮之事或卽有志竟成之事也已酉孟春鹽山張錫純壽甫氏書於志誠堂

題詞

淵源仲景舊家聲博考旁通術益精薄海同胞關痛癢中華醫放界光明滿腔熱血如潮湧到處陽春著手成脈案方書千萬卷慈心濟世獨先生
瀋陽愚弟李樹勛翰宸敬題
抱負非凡韋布身遭逢時世偃經論青囊小試活人術大地釀成不老春

安新愚弟楊世榮杏村敬題

良醫良相本相同妙藥功參造化功萬里相延

時先生寓湖北漢皋

來塞外活人事業徧遼東

鐵嶺愚弟劉尙清海泉敬題

同胞疾苦最關心費盡精神著等身恍若旱苗齊待雨權將靈素化甘霖

瀋陽愚弟苗蘭生孟馥敬題

八卷方書闡隱微聲名無羽六州飛大悲閣上東風起吹到塵寰轉化機

黃縣同學社弟淳于兆禧廉谿敬題

醫界浮沈二十年讀君大著心豁然從今識得活人術歷試羣方妙勝仙

鐵嶺同學社弟吳衷輯瑞五敬題

閱徧方書意渺茫偶讀大著喜如狂中西合撰發名論醫界撐持有棟梁

柳河小弟王德一尊三敬題

憶在荆門覩此書精言名論近今無署名喜出同宗手一脈相傳紹漢初

青縣同宗弟樹筠敬題

仲景醫宗衆所欽後先輝映古同今著書盡洩苞符祕具見先生濟世心

南昌愚弟萬灃敬題

冀北儒醫矯不羣鯁生何幸接蘭薰雄談汨汨河懸水神態悠悠岫出雲勝日郊坰從遣興忘年樽酒快論文匆匆半歲駒光盡風雨鷄鳴輒憶君
灤縣愚弟桑麟祥素村敬題

胸羅靈素費揣摩腹貯奇才勝緩和德被羣黎消疫癘功參造化濟人多

潛江愚弟朱登五敬題

學貫天人醫理通此心久欲坐春風活人無量恆河數妙藥深參造化功

天門後學崔壽康蘭亭敬題

南陽而後道沈淪醫學紛更莫問津幸有此編昭日月農軒事業又重新

同邑愚弟李恩綽曰綸敬題

書著活人苦費心學經閱歷益深深探源庖羲靈明闡究極軒岐奧義尋神術救時留寶笈良方餉世度金針宣傳簡冊足千古仲景風規又到今 同邑愚弟黃祺海仙槎敬題

鴻綱細目手編摩醫界指南受益多精力過人成妙手苦心救世洗沈疴神靈默相追倉扁診斷分明婉緩和案列此書生異彩震驚二豎不爲魔 津沽後學楊秀章學忱敬題

遠紹靈素得真傳醫藥活人到處然濟救蒼生無限苦學參造化貫人天

瀋陽受業王德峻子岡敬題

心存匡濟裕經猷遭際偃蹇志莫售權託刀圭活衆庶良醫良相本同流

棗強受業李書剛毅伯敬題

醫國醫人易地然廣行仁術徧坤乾萬言靈素羅胸臆四海蒼黎待保全著作爲經參造

例言

一發明藥性之書始於神農本經其書爲有文字之後第一書

易雖在先其時猶無文字

簡策之古可知其

書共載藥三百六十五味以象周天之日數分上中下三品上品者養生之藥也中品者治病之藥也下品者攻病之藥也各品之下皆詳載其氣味與主治明其氣味主治之理亦卽寓其中矣而藥性獨具之良能又恆有出於氣味之外者古聖洞徹精微皆能爲之一一表出此在醫學中誠爲開天闢地之鼻祖也乃後人識見短淺凡於藥有獨具之良能不能以氣味推求者皆刪去不載如桂枝治上氣吐吸吸不下達卽吐出卽喘者之不納氣也甚效本經載之而後世本草不載也山茱萸治寒熱往來肝虛極者之寒熱往來甚效本經載之而後世本草不載也若此者不勝舉愚每觀至此等處恆深爲惋惜故斯編於論藥性處皆引述本經而於後世本草不輕採取也或有疑其未載明入何臟腑及何經絡者不知其所主何病卽知其藥力能至何處究之服藥後藥隨氣血流行無處不到後世之詳爲分疏其臟腑經絡者似轉貽學者以拘墟之弊也

一闡發醫理之書始於黃帝內經其書係黃帝與其臣岐伯伯高鬼臾雷公相問答之詞分

爲素問靈樞素問大旨以藥治病靈樞大旨以鍼灸治病特其年遠代湮不無殘缺古時相傳多以口授尤易亡失故晉皇甫謐言其書不完全宋林億疑其書有僞託且仲景傷寒論序謂撰用素問九卷今素問二十四卷其中有僞託可知然其醇粹之處確乎貽之聖神斷非僞託者所能爲卽如以鍼灸治病此時爲東西所共認設非古聖開其始後世能創造乎卽西人之細講剖解者能創造乎是以讀內經之法但於其可信之處精研有得卽能開無限法門其不可信之處或爲後世僞託付之不論可也此孟子所謂書難盡信之義也乃今之偏重西法者不於內經可信之處費心研究但於其不可信之處極力指摘推其意見直謂內經真本久失所傳於世者皆係僞託有斯理乎夫我四萬萬同胞皆黃帝之子孫也以祖宗嘉惠後人之典冊不知抱殘守缺倍加愛護而轉欲弁毛棄之此真令人可發浩嘆者也故斯編於各門中祖述內經之處甚多而於後世醫書之祖述內經者若難經若傷寒金匱諸書亦偶有所採取焉

一斯編所載之方多係拙擬間有用古人成方亦恆有所加減或於方中獨有會心之處亦偶載其方面詳爲疏解又於各門方後附錄西人恆用之效方及西藥試之果有實效者

至論臟腑經絡之處恆兼取道家之說以其授受有自來也又間採西人之說以其剖驗有實攷據也

一西人於臟腑剖驗雖精而仍有未能剖驗之處人之臟腑有氣有血有功用有性情西人剖驗之學詳於論血略於論氣能明臟腑之功用未識臟腑之性情究於醫學未臻醇備斯編論臟腑之氣血及其功用性情不但多爲西人所未發明卽漢晉以來名醫亦多有未發明者

一西人之藥喜用猛烈之品吾中華服之恆與臟腑有不宜誠以西人多肉食吾人多穀食自幼養料既異臟腑之性質卽因之有異斯編於用西法處恆取其化學之理運用於醫理之中而自處方藥卽間有引用西藥之時亦必其性稍和平不至含有猛烈毒性者

一古人用藥多是煎一大劑分三次服下病愈不必盡劑不愈者必一日服盡此法今人不講久矣愚治傷寒瘟疫與一切急證必用此法蓋治此等證勢如救火以水潑之火勢稍減若不連番潑之則火勢復熾而前功盡棄若治他證不必日服藥三次亦必朝夕各服藥一次煎漬再服可權作一次使藥力晝夜相繼見效自速也

一富貴之家服藥多不用次煎不知次煎原不可廢慎柔和尙治陰虛勞熱專用次煎取次煎味淡善能養脾陰也夫淡氣歸胃內經曾言之淡能養脾陰之義原自淡氣歸胃悟出而其所以然之故人仍多不解徐靈胎曰洪範言五行之味水曰潤下潤下作鹹火曰炎上炎上作苦木曰曲直曲直作酸金曰從革從革作辛皆直言其物之本味至於土則變其文曰土爰稼穡稼穡作甘蓋土本無味借稼穡之味以爲味夫無味卽是淡故人脾胃屬土凡味之淡者皆能入脾胃也又按治陰虛專責重於脾人亦多不解陳修園謂脾爲太陰乃三陰之長故治陰虛者當以滋脾陰爲主脾陰足自能灌溉諸臟腑也

一白虎湯中用粳米古方生用今人亦生用至於薏米芡實山藥之類猶粳米也諸家本草多註炒用者爲丸散計耳今人用之入湯劑亦必炒熟殊令人不解惟專用以健脾胃或可炒用若用以止瀉利卽不宜炒蓋生者汁漿稠黏可以留戀腸胃若炒熟煮之則無汁漿矣至於用以滋陰用以淡滲則不宜炒熟尤彰彰明矣

一今之黨參卽古之人參爲其生於山西之上黨山谷故曰黨參而生於山西之五臺山者尤佳故又別之曰臺黨參與今之遼東人參原非一種而氣溫性和實較遼人參爲易用

且其價又甚廉貧家亦可服用誠濟世之良藥也。今遼東亦多有此藥不必皆生於山西然必參皮作橫紋若胡萊菔之紋而更密於胡萊菔之紋者方爲野山自生之參用之以代人參甚有功效若無橫紋係土人種植之物不堪用也。又斯編方中所用人參皆可用野黨參代之而不可用遼東秧參代之遼東秧參俗名高麗參其性燥熱不宜輕用而用於傷寒瘟疫諸方中尤非所宜又有潞黨參皮色微紅生於潞安紫團山故又名紫團參其補力亞於臺黨參而性平不熱用於氣虛有熱者甚宜。

一黃芪入湯劑生用卽是熟用不必先以蜜炙若丸散劑中宜熟用者蜜炙可也若用治瘡瘍雖作丸散亦不宜炙用王洪緒證治全生集曾詳言之至於生用發汗熟用止汗之說尤爲荒唐蓋因氣分虛陷而出汗者服之卽可止汗因陽強陰虛而出汗者服之轉大汗汪洋若氣虛不能逐邪外出者與發表藥同服亦能出汗是知其止汗與發汗不在生熟亦視用之者何如耳。

一石膏寒而能散以治外感有實熱者直同金丹神農本經謂其微寒則性非大寒可知且謂其能治產乳則性甚純良可知世人多誤認爲大寒而燬用之則辛散之性變爲收斂。

點豆腐者必煨用
以其能收斂也

用於外感有實熱者至一兩卽能傷人。因外感之熱宜散不宜斂也。乃重用煨石膏而僨事者。不知其誤在煨不在石膏。轉謂煨用之而猶猛悍如此。則不煨者更可知矣。於是遂視用生石膏爲畏途。卽有放胆用者。亦不過七八錢而止。夫石膏之質甚重。七八錢不過一大撮耳。以微寒之藥欲用一大撮以挽回極重之寒溫。又何能有大效。是以愚治外感有實熱者。輕證亦必用至兩許。若實熱熾盛。又恆重用至三四兩。將藥煎湯數鍾。分三四次溫飲下。欲以免病家之疑。且欲其藥力常在上焦。而寒涼不侵下焦。致滑瀉也。蓋石膏生用以治外感實熱。斷無傷人之理。且放胆用之。亦斷無不能退熱之理。特是坊間軋細之石膏多係煨者。卽方中明開生者。亦恆以煨者充之。因煨者其所素備。且又自覺慎重也。故凡用生石膏者。宜買其整塊明亮者。自監視軋細方的。

或問同一石膏也。何以生用之則能散。煨用之則性之散者驟變爲斂乎。答曰。石藥之性與草木之藥不同。恆因煨與不煨而其性迥異。如丹砂無毒。煨之卽有毒。煨石作石灰。其燥烈之性頓發。以水沃之。其熱如火。石膏原硫養輕鈣化合而成。煨之則硫養輕皆飛去。所餘之鈣已變爲石灰。黏澀異常。是以燒洋灰者必多用石膏。洋灰豈可服乎。故凡煎石